



*Ioseph deliure ses freres , retient Simeon ; leur fait bailler du bled ,  
& remettre l'argent en leurs sacs.*

**L**ES enfans d'Israël se trouuerent en grande perplexité d'estre retenus prisonnier par le Gouverneur d'Egypte, duquel ils auoient exactement esté interrogez de leurs noms & estre, & les maintenoit espions. Mais humblement s'excusans, disoient, Nous seruiteurs de vostre Altesse sommes venus pour acheter des viures seulement: Nous sommes douze freres, tous d'un homme en la terre de Chanaan, dont le plus petit est avec nostre pere, & l'autre n'est plus. Ioseph leur dit: Je vous ay dit, que vous estes espions, & ne sortirez d'icy jusques à tant que vostre petit frere soit venu. Enuoyez l'un de vous, & qu'il l'ameine: mais vous demeurerez liez jusques à tant que vos paroles soient verifiées. Or Ioseph se détourna d'eux, & pleura, puis reuint & parla à eux; & prenant Simeon le fit lier en leur presence, & le retint jusques à ce qu'ils eussent amené leur petit frere; leur fit emplir leurs sacs de froment, & remettre leur argent dedans: & du bled davantage pour viure par le chemin, & ainsi partirent. Mais l'un d'iceux voulant bailler la prouende à son asne, trouua son argent à la gueule du sac, ce que montrant à ses freres, ils en furent tous troublez, craignans d'estre surpris.

*Genese 42. Chap.*